



L' anje avou lès solés

Arthur SCHMITZ (Wardin)

Dins on ptit viadje di l' Ârdène on curé ârot bin vlu avè on-anje dins si èglîje. Il avot dmandé a on martchand di statûes kibin ç' ki ça costrot po on bê anje du plâte, avou lès pènâs drovus. Mês come c' èstot trop tchîr po sa bouëse, il avot dmandé a on pinte di li pinturer on anje dissu on bokèt d' mour do costé di l' âté dol Sinte Vièrje. Il avot dné kékes imâdjès avou dès anjes o pinte po li sièrvu d' modèle.

Do timps ki l' curé èstot voy an rtrête a Marèdsous, li pinte peinture on-anje avou lès pènâs drovu, one bleûe tchmîje èt dès rodjes solés.

Kand l' curé rintère dol ritrête, i passe a l' èglîje èt i manke di toumer flawe an vèyant ki l' pinte avot mètu dès solés a l' anje. Tote la nut', i n' sèt nin clôre l' û télmint ki ça l' rumine. Li landmwin, après la mèsse, i passe addé l' pinte èt dvant di li dire bondjoû, i dit come ça :

– D' où ç' ki vos avoz vèyu on-anje avou dès solés ?

Li pinte sins s' mâvrer rèspond :

– Èt vos, Mossieû l' curé, d' où ç' ki vos avez vèyu on-anje sins solé ?

(endendu à Libin)

– Dumwin, c' èst l' djoû nôs trante ans d' mariadje, di-st-èle la cinsrèsse a s'n-ome ; sabâye si on touwot l' pourcê ?

– Poucwè ruspond l' cinsî, çu n' èst nin d' sa fôte !